

83. fundur Breiðafjarðarnefndar, haldinn 5. nóvember 2007 í Stykkishólmi.

Mættir: Friðjón Þórðarson formaður, Ásgeir Gunnar Jónsson, Eiríkur Snæbjörnsson, Magnús A. Sigurðsson, Róbert A. Stefánsson, Sigurður Þórólfsson og Þórólfur Halldórsson.

Guðríður Þorvarðardóttir varaformaður boðaði forföll.

Fundarritari: Sigríður E. Elisdóttir.

Fundur settur kl. 11:00.

Dagskrá:

Fundargerð 82. fundar

Formaður las fundargerðina.

Afgreiðsla: Fundargerðin var samþykkt.

Rannsóknáætlun fyrir Breiðafjörð

Róbert kynnti efni rannsóknáætlunarinnar, sem er enn í vinnslu. Rannsóknáætlunin verður lögð fram þegar hún er tilbúin, sem hann vonast eftir að verði fyrir næsta fund. Þá lagði hann fram til kynningar glærur Arnþórs Garðarssonar frá fyrirlestri sem hann hélt um lífríki Breiðafjarðar á vinnufundi um gerð rannsóknáætlunar.

Einnig var lögð fram til kynningar samantekt á veiddum afla úr Breiðafirði 1991-2006 og skýrslan "Þangsláttur og þaratekja í Breiðafirði árin 1995-2006 (landaður afli á Reykhólum)". Fram kom athugasemd um að rannsóknáætlunin tæki ekki til allra sviða náttúruvísinda, m.a. eru rannsóknir á jarðvegi og gróðurfari í eyjum ekki með. Róbert svaraði spurningum nefndarmanna og tók við athugasemdum þeirra.

Afgreiðsla: Málinu verður fylgt eftir af hálfu nefndarinnar þegar rannsóknáætlunin liggur fyrir. Umhverfissráðherra verður boðið á næsta fund nefndarinnar þar sem henni verður afhent rannsóknáætlunin náist að klára hana fyrir fundinn.

Verndaráætlun fyrir Breiðafjörð 2007-2017

Náttúrustofa Vesturlands hefur um hríð unnið að gerð tillögu nýrrar verndaráætlunar í verktöku fyrir Breiðafjarðarnefnd. Á fundinum lagði Róbert fram endurskoðaða tillögu að forgangsröðun verkefna fyrir verndaráætlun eftir að hafa tekið tillit til athugasemda nefndarmanna frá síðasta fundi.

Magnús mun ljúka gerð tillagna við c-lið sem fjallar um menningarminjar.

Drögin voru rædd.

Þórólfur, Eiríkur, Sigurður og Ásgeir Gunnar lögðu til að b-liður um tilnefningu á Ramsar- og Heimsminjaskrá færðist aftar í forgangsröðun og yrði að lið d og að aðrir liðir færðust upp sem því nemur. Þeir töldu einnig að setja ætti fyrirvara í texta um tilnefningarnar á þann veg að þær „hindri ekki möguleika sveitarfélaga við Breiðafjörð til að byggja upp innviði sína, sérstaklega hvað varðar nútímaleg samgöngumannvirki." Þá gerðu þeir einnig tillögu um að taka út texta um að í tilnefningu fælist viðurkenning á sérstöðu svæðisins og að hún styrkti vernd þess og var það samþykkt en Róbert var því mótfallinn.

Afgreiðsla: Breytingartillaga fulltrúa sveitarfélaga á orðalagi í forgangsröðun verkefna var samþykkt. Forgangsröðunin í heild var samþykkt að þeim breytingum gerðum.

Reglur um byggingar í eyjum á Breiðafirði

Rætt var um að gott væri að hafa lista yfir þær eyjar sem hafa verið í ábúð á einhverjum tímamarki frá árinu 1703, og fram kom hugmynd um að fá háskólanema til að vinna slíkan lista og semja við Háskóla Íslands um það.

Róbert lagði til að með afgreiðslum mála um byggingar í eyjum sendi nefndin vinnureglur sínar um feril mála og sjónarmið við umsagnir um veitingu byggingarleyfa eða leyfa til mannvirkjagerðar á verndarsvæði Breiðafjarðar sem fylgiskjal.

Rætt var hvort hægt væri að setja reglur um útlit húsa á verndarsvæðinu, en fram kom að sá þáttur er á hendi sveitarfélaga. Þá var rætt að kynna sér hvernig þessum málum er háttað á verndarsvæðum á Norðurlöndum.

Afgreiðsla: Magnús mun kanna hjá Háskóla Íslands hvort mögulegt sé og þá hvernig best væri að setja upp nemendaverkefni um gerð heimildalista yfir búsetu í eyjum.

Ákveðið var að við afgreiðslu mála um byggingar í eyjum sendi nefndin vinnureglur sínar um feril mála og sjónarmið við umsagnir um veitingu byggingarleyfa eða leyfa til mannvirkjagerðar á verndarsvæði Breiðafjarðar sem fylgiskjal.

Ákveðið var að fela Guðríði að kanna hvernig reglum um byggingar á verndarsvæðum á hinum Norðurlöndunum sé háttað.

Fjármál Breiðafjarðarnefndar

Ritari lagði fram fjárhagsáætlun til næstu áramóta. Rætt var um ráðstöfun þess fjármagns sem nefndin hefur til umráða í verkefni.

Ákveðið var að ræða við Sverri Jakobsson um áframhaldandi samstarf um skráningu á sögu Breiðafjarðar. Einnig var rætt um áframhaldandi samstarf við Háskóla Íslands og Guðrúnu Gísladóttur dósent um nemendaverkefni við örnefnaskráningar.

Rætt var um að setja í gang fleiri nemendaverkefni næsta sumar við örnefnaskráningar. Þá er hugsanlegt að skráning á búsetusögu í eyjum hafi einhvern kostnað í för með sér.

Afgreiðsla: Guðríði var falið að hafa samband við Guðrúnu Gísladóttur varðandi frekara samstarf um nemendaverkefni við örnefnaskráningar. Friðjón hefur samband við Sverri Jakobsson.

Kortagrunnur Loftmynda ehf. yfir Breiðafjörð

Ritari lagði fram tilboð í afnot af kortagrunni Loftmynda ehf. yfir svæðið í kringum Breiðafjörð.

Afgreiðsla: Ákveðið var að semja um tímabundinn aðgang að grunninum þegar aðili hefur verið fenginn til að sinna örnefnaskráningum.

Hús fyrir gistipjónustu í Flatey

Lagt var fram erindi Umhverfisstofnunar, dags. 25. október 2007, þar sem óskað er eftir umsögn nefndarinnar um erindi Flateyjarferða ehf. Með erindi sínu óskar félagið eftir að fá að reisa gistipjónustuhús í Flatey.

Erindið var rætt.

Afgreiðsla: Breiðafjarðarnefnd tekur ekki afstöðu til þessarar einstöku framkvæmdar en telur mikilvægt að Reykhólahreppur láti vinna heildar skipulag fyrir Flatey.

Breiðafjörður og Ramsar-samningurinn

Lögð var fram til kynningar ræða umhverfisráðherra á Umhverfispingi 12. október 2007. Í ræðunni kom m.a. fram að ráðherra hafi óskað eftir því að þrjú ný svæði verði tekin inn á skrá Ramsar-samningsins um vernd votlendissvæða. Eitt þessara svæða er Breiðafjörður.

Strandmenning Íslands

Guðríður, fyrir hönd Breiðafjarðarnefndar, sótti ráðstefnu sem haldin var 5. október sl..

Afgreiðsla: Umræðu um ráðstefnuna var frestað til næsta fundar vegna fjarveru Guðríðar.

Breiðafjarðarfléttan – Klasasamstarf í ferðaþjónustu á Breiðafjarðarsvæðinu

Lagður var fram til kynningar tölvupóstur, dags. 6. október sl. frá Svanborgu Siggeirsdóttur, formanni stjórnar Breiðafjarðarfléttunnar, sem eru nýstofnuð samtök aðila í ferðaþjónustu við Breiðafjörð. Framkvæmdastjóri er Ingibjörg Þórhallsdóttir. Fulltrúum frá Breiðafjarðarnefnd hefur verið boðið að koma á fund stjórnarinnar sem haldinn verður í Búðardal föstudaginn 9. nóvember nk.

Afgreiðsla: Magnús og Sigurður munu sækja fundinn fyrir hönd nefndarinnar. Friðjón mun jafnvel líta inn á fundinn ef hann verður staddur í Búðardal.

Fundi slitið kl. 14:30.

Næsti fundur var ákveðinn 10. desember nk. í Umhverfisstofnun, Reykjavík.